

# «El entaupa mintga persuna cun respect»

Tumein: Festa per il nov president dal Cussegl grond

DA GION NUTEGN STGIER/FMR

■ **En in rom fitg personal ha la popula-ziun da la vischnanca da Tumein undrà Martin Wieland cun el ussa manar in onn il parlament grischun. El saja intenziunà, serius, fidà, modest, sappia pero er esser stinà, è vegnì ditg.** In onn senza coronavirus èsi tradiziun che suenter la tscherna dal nov president dal Cussegl grond vegn el a la fin da quella sessiun d'avust festivà en sia vischnanca. A pled vegnan blers gratulants e lura er ils schefts da las fracziuns che prendan per ina giada la politica in pau main seriusa. In gientar da gala, er quel na manca betg e quai è er d'attribuir a las bleras producziuns da chant e musica. Sonda passada, il di che la vischnanca da Tumein ha fatg festa per *Martin Wieland* sco nov president dal Cussegl grond, ha il program na cumpiglià tut quai. Tuttina è l'occurrenza stada fitg festiva, empernaivla, organisada fitg bain.

## Grond respect envers mintga persuna

En quella furma pli modesta saja stada l'unica pussaivladad da render onur ad el, ha ditg *Andrea Pargätzi*, la vicepresidente communal da la vischnanca da Tumein. La tscherna da *Wieland* sco president dal Cussegl grond haja gè lieu en in'otra normalità, en in mund insolit e sut circumstanças particularas. Per ils bunamain 200'000 abitants da noss chantun saja el uss fin l'avust 2021 il pli aut Grischun ed il segund president dal Cussegl grond che deriva da la vischnanca da Tumein. Mintgin ch'haja da collavurar, lavurar e contrahar cun *Wieland* dastgia esser ventirai-vel. «El è in um ch'entaupa mintga persuna cun respect, el è fitg real, ils buns contacts politics ha el er ed ina da sias fermezzas è la comunicaziun», ha ditg *Pargätzi*. En scadin cas davart da la vischnanca



Da cusseglier *Christian Rathgeb* (dretg) survegn *Martin Wieland* sco regal las cornas da capricorn.

FOTO GION NUTEGN STGIER

da Tumein cun ses 1200 abitants haja el segir il sustegn duaivel, ha menziunà la dunna. Sco punct culminant è *Wieland* vegnì onurà sco burgais d'onur da la vischnanca da Tumein. In titel che fetschia ad el gest tant plaschair sco l'elecziun sco president dal Cussegl grond.

## Quel privilegi n'ha betg mintgin

A pled è lura er vegnì *Christian Rathgeb*, il president da la regenza. El ha cunzunt declarà als preschents il pensum principal dal president dal Cussegl grond. *Wieland* saja dal reminent l'emprim or-

tulan che saja daventà parsura dal parlament chantunal. Er *Rathgeb* ha ludà ses ami da partida, el che presta lavur seriusa, fidada ed orientada a soluziuns. En ils proxims 12 mais haja *Wieland* da sa participar ed esser preschent a bunamain 300 occurrenzas. El haja lura in privilegi che be paucs Grischuns hajan, dastga *Wieland* uss ir adina puspè per via cun ses agen manischnunz e cun l'auto cun ils numers da l'auto GR 1 ubain GR 2, ha manegià il president da la regenza. *Erich Kohler*, il president da la conferenza dals presidents commu-

nals da la regiun Plaun, el ha ditg che *Wieland* saja ina persuna fitg versada ed er cun ina lingia correcta. Gratulà al pli aut Grischun ha lura er *Peter Jörimann*, el che stat al timun da la vischnanca burgaisa da Tumein. *Gian Battista von Tschärner*, il chastellan dal chastè a La Punt-Rehanau, el ha ditg cun in surrir ch'ussa cun esser *Wieland* president dal Cussegl grond dastgia el cun avair dimora a Tumein guardar giu sin ses subdits da La Punt-Rehanau. En l'istorgia da quels dus lieus na saja quai betg adina stà uschia.